



**PROTOCOL RADUNONZA COMMUNALA LUMNEZIA
15 DA MARS 2024**

2024/01

15 DA MARS 2024
CANZLIA COMMUNALA, 7144 VELLA
Palius 32D, 7144 Vella

Tractandas

| | |
|--|---|
| 1. Avertura | 3 |
| 2. Protocol dalla radunonza communal da dils 15 da december 2023 (2023/04)..... | 3 |
| 3. Rendaquen final per la sanaziun dalla Punt Tgiern el vischinadi da Vrin | 3 |
| 4. Sanaziun dalla via communal Mulin, Vella..... | 4 |
| a) Approbaziun dil project..... | 4 |
| b) Concessiun dil credit CHF 520'000..... | 4 |
| 5. Sanaziun dalla via cantunala tras Lumbrein, cumpart dalla vischnaunca Lumnezia | 5 |
| a) Approbaziun dil project..... | 5 |
| b) Concessiun dil credit CHF 1'560'000 | 5 |
| 6. Project collectiv SIE, sanaziun via d'uaul Seglias (tschancun Sutscheins-Butschaniz) el vischinadi da Suraua..... | 7 |
| 7. Naturalisaziuns | 8 |
| a) Manuel Eicher ed affons Anuk e Nevin Eicher | 8 |
| b) Ruth Elisabeth Artho..... | 8 |
| 8. Varia | 9 |

Protocol dalla radunonza communal Lumnezia (2024/01)

Datum: Venderdis, ils 15 da mars 2024
Liug: Halla plurivalenta dalla casa da scola Sutvitg 28E, 7144 Vella
Cuoz: 20:00 – 21:30 uras
Presents: 55 votantas e votants
Parsura: Daniel Solèr, president communal
Actuara: Silvana Caviezel, canzlista communal

Tractandas

1. Avertura

Il president communal Daniel Solèr arva la radunonza communal fagend beinvegni als presents ed engrazia ad els d'haver dau suatientscha agl invit.

Il president constatescha, che la radunonza communal ei vegnida convocada ad uras conform allas determinaziuns digl artechel 44 ella constituziun dalla vischnaunca Lumnezia, aschia che la radunonza ei cumpetenta da prender conclus.

Seschau perstgisar han:

- Gabriel Sgier, menader dil survetsch tecnic communal
- Selina Crivelli, menadra dalla partiziun finanzas e persunal communal
- Rino Caviezel, cumandant da pumpiers
- Gian Derungs, deputau dil cussegl grond
- Kurt Soller, commember dalla cumissiun da gestiun communal

La radunonza elegia dus dumbvuschs

- Alexander Casanova, Lumbrein
- Remigi Brunold, Vella

2. Protocol dalla radunonza communal dils 15 da december 2023 (2023/04)

Il protocol dalla radunonza communal dils 15 da december 2023 ei staus exponius naven dils 29 da december 2023 ella canzlia communal e silla pagina d'internet dalla vischnaunca, pia duront silmeins 30 dis.

Tenor art. 34 constituziun vegn il protocol dalla radunonza communal exponius per investa dils votants sil pli tard in meins suenter la radunonza duront 30 dis en casa communal e silla pagina d'internet dalla vischnaunca cun corrispudenta publicaziun. Recuors ein d'inoltrar en scret duront quei temps dall'exposiziun alla suprastonza communal. Ils recuors vegnan tractai alla proxima radunonza communal. Decisiva ei aschia la publicaziun silla pagina d'internet dalla vischnaunca (cun corrispudenta publicaziun).

Il president communal Daniel Solèr constatescha, ch'igl ei buca vegniu inoltrau recuors en scret aschia ch'il protocol dalla radunonza communal dils 15 da december 2023 (2023/04) vala sco approbaus tenor art. 34 dalla constituziun dalla vischnaunca Lumnezia.

3. Rendaquen final per la sanaziun dalla Punt Tgiern el vischinadi da Vrin

Introducziun

Ils 18 da mars 2022 ha la radunonza communal Lumnezia approbau il project e concediu il credit da CHF 700'000 per la sanaziun dalla via d'uaul Punt Tgiern a Vrin.

Las lavurs ein vegnidas exquidas ed il quen siara cun in rest da credit da CHF 164'486.35.

| Buch. Datum | Belegart | Belegnr. | Kontonr. | Gegenkonto | Anlagennr. | Buchungsbeschreibung | Ausgaben | Einnahmen | Saldo |
|--------------|----------|-----------|----------|------------|------------|---|-------------------|-------------------|-------------------|
| 20.07.22 | Rechnung | KRE221415 | 5010.00 | | ANR00175 | Savoldelli Tanno SA, 1. aquen lavurs d'impressari | 101'899.35 | | 101'899.35 |
| 29.09.22 | Rechnung | KRE222266 | 5010.00 | | ANR00175 | Baugeologie und Geo-Bau-Labor AG, Lavurs da geolog | 864.85 | | 102'764.20 |
| 20.10.22 | Rechnung | KRE222415 | 5010.00 | | ANR00175 | Savoldelli Tanno SA, 2. aquen lavurs d'impressari | 223'921.15 | | 326'685.35 |
| 17.11.22 | Rechnung | KRE222620 | 5010.00 | | ANR00175 | Vischnaunca Sumvitg, Darschuns | 52.00 | | 326'737.35 |
| 17.11.22 | Rechnung | KRE222621 | 5010.00 | | ANR00175 | Finanzverwaltung des Kantons GR, Amt für Jagd und Fischerei GR, pescar gliu Glogn | 1'146.60 | | 327'883.95 |
| 01.12.22 | Rechnung | KRE222736 | 5010.00 | | ANR00175 | Savoldelli Tanno SA, 3. aquen lavurs d'impressari | 102'400.75 | | 430'284.70 |
| 06.12.22 | | R2200347 | 6310.00 | | ANR00175 | Amt für Wald und Naturgefahren GR, 1. pagament | | 201'600.00 | 228'684.70 |
| 23.12.22 | | R2200374 | 6310.00 | | ANR00175 | Amt für Wald und Naturgefahren GR, 2. pagament | | 104'400.00 | 124'284.70 |
| 31.12.22 | Rechnung | KRE223186 | 5010.00 | | ANR00175 | Walter Deplazes, 1. aquen lavurs d'inschignier | 63'004.50 | | 187'289.20 |
| 31.12.22 | Rechnung | KRE223407 | 5010.00 | | ANR00175 | Baugeologie und Geo-Bau-Labor AG, Lavurs da geolog | 1'457.70 | | 188'746.90 |
| 31.12.22 | Rechnung | KRE223504 | 5010.00 | | ANR00175 | Savoldelli Tanno SA, Quen final lavurs d'impressari | 33'771.25 | | 222'518.15 |
| 05.05.23 | | R2300117 | 6310.00 | | ANR00175 | Amt für Wald und Naturgefahren GR, 3. pagament | | 46'800.00 | 175'718.15 |
| 31.12.23 | Rechnung | KRE233737 | 5010.00 | | ANR00175 | Walter Deplazes, Quen final lavurs d'inschignier | 6'995.50 | | 182'713.65 |
| 31.12.23 | | F2300087 | 6310.00 | | ANR00175 | Amt für Wald und Naturgefahren GR, pagament final | | 32'769.85 | 149'943.80 |
| Saldo | | | | | | | 535'513.65 | 385'569.85 | 149'943.80 |

Rest da credit: CHF 164'486.35

Proposta

La suprastonza communal propona alla radunonza d'approbar il rendaquen final per la sanaziun dalla via d'uaul Punt Tgiern el vischinadi da Vrin cun in rest da credit da CHF 164'486.35

Conclus

La radunonza communal decida cun gronda maioritad, senza cuntervuschs ed abstenziuns, d'approbar il rendaquen final per la sanaziun dalla Punt Tgiern el vischinadi da Vrin cun in rest da credit da CHF 164'486.35.

4. Sanaziun dalla via communal Mulin, Vella

a) Approbaziun dil project

b) Concessiun dil credit CHF 520'000

Introducziun

Naven dalla via cantunala sper la caplutta da s. Roc tochen a Mulin, Vella ei la via communal en in schliet stan e sto vegnir sanada. En quei connex vegnan era gest las colligiaziun d'aua, respectivamein las separaziuns dallas auas piarsas per las parcelas privatas vischinontas controlladas e sanadas ni separadas, nua che quei ei necessari.

Il project vegn presentaus alla radunonza communal dil schef dil departament communal per traffic, ovras publicas ed ambient, Nathan Solèr.

La survesta da cuosts:

| Lavurs | Credit |
|-------------------------------------|---------|
| Sanaziun via | 244'000 |
| Provediment d'aua | 88'000 |
| Canalisaziun | 60'000 |
| Passapei | 36'000 |
| Illuminaziun publica (cumpart reit) | 21'000 |
| Planisaziun e survigilonza | 16'000 |
| Divers e reserva | 55'000 |

| | |
|--------------|----------------|
| Total | 520'000 |
|--------------|----------------|

Damondas e menziuns

Marco Sgier da Vella damonda sch'ei seigi planisau enteifer il project da tschaffar las auas piarsas a Mulin, che seigien oz aunc buca ligiadas ella canalisaziun dalla vischnaunca.

Nathan Solèr rispunda che las auas dallas casas giudem stuessien vegnir pumpadas ensi e quei seigi buc ina part dil project actual.

Rudolf Caduff da Cumbel damonda sch'ins vessi bu grad saviu ponderar d'extender ils parcadis sper scola tochen sitier il clavau enstagl da far mo treis parcadis daplì.

Il president Daniel Solèr declara ch'ei seigi tenor plan general pusseivel da far mo treis parcadis. Plinavon seigi la parcella tochen sitier il clavau en proprietad privata da Rosmarie Derungs-Tanno da Vella.

Mario Derungs, igl um da Rosmarie Derungs, ei presents alla radunonza e conferma che la suprastonza hagi giu contact cun els pertuccond quella damonda. El gi denton era che tenor siu meini stuessi plitost vegnir empruau da tener il traffic naven dalla scola e buca aunc promover che daplirs autos mondien da quella via si e giu. Vitier vegni che la parcella da sia dunna seigi actualmein buca en zona da baghegiar e quei fussi lu la finamira da saver metter en quella parcella en zona sche ina da sias feglias quintassi eventualmein da turnar en vischnaunca per baghegiar casa. En mintga cass seigien els segiramein prompts da sediscuorer sur dalla caussa.

Proposta

La suprastonza communal propona alla radunonza d'approbar il project e da conceder il credit da CHF 520'000 per la sanaziun dalla via communal Mulin, Vella.

Conclus

La radunonza communal decida cun gronda maioritad e senza cuntravusch d'approbar il project e da conceder il credit da CHF 520'000 per la sanaziun dalla via communal Mulin, Vella.

5. Sanaziun dalla via cantunala tras Lumbrein, cumpart dalla vischnaunca Lumnezia

a) Approbaziun dil project

b) Concessiun dil credit CHF 1'560'000

Introducziun

Igl Uffeci da construcziun bassa dil Grischun sanescha la via cantunala tras Lumbrein e quei sur pliras etappas. Entschiet cun las lavurs vegn il 2024 all'entschatta dil vitg, davart encunter Glion. Silsunter ein planisadas il 2025 las lavurs naven dalla scola tochen tier la Casa d'Angel ed alla fin dil vitg naven da Buortga tochen Caninas. La davosa etappa, il 2026 ei lu la part naven dalla Casa d'Angel tochen a Buortga.



Il medem mument sanescha la vischnaunca Lumnezia sias cumparts dalla via. Las lavurs dalla vischnaunca cumprendan las colligiaziuns d'aua, dismessa e separaziun dallas auas piarsas sco era passapei, fermadas da posta, suosta da spetga, illuminaziun publica ed, en collaboraziuns culs privats, era ils plazs privats che cunfineschan culla via cantunala.

Il schef dil departament per agricultura, Martin Sgier e Curdin Capeder, schef dil departament

per turissem ein dus dils commembers ella cumissiun da project. Els presentan il project alla radunonza communal.

Per saver tener dapart meglier las lavurs declara Curdin Capeder la cumpart ch'il cantun ei responsabels. La summa digl entir project sebasa sin offertas e munta a CHF 3.5 milliuns.

Silsuenter declara Martin Sgier la cumpart che pertucca la vischnaunca. El menziunescha era ch'il vitg da Lumbrein ei sut protecziun ISOS, quei che simplifichescha buca exnum las lavurs.

| Lavurs | Credit |
|--|------------------|
| Passapei | 415'000 |
| Fermada da posta | 190'000 |
| Suosta da posta | 40'000 |
| Canalisaziun | 140'000 |
| Lingia da meteor (communabel cun cantun) | 175'000 |
| Plaz publics | 80'000 |
| Illuminaziun (cumpart reit) | 125'000 |
| Planisaziun e survigilonza | 115'000 |
| Acquist da terren (incl. geometer) | 130'000 |
| Divers e reserva | 150'000 |
| Total | 1'560'000 |

| Categoria da lavurs | Credit |
|------------------------------------|------------------|
| Lavurs d'impresari | 850'000 |
| Lavurs da cuvrada | 270'000 |
| Lavurs d'electric | 45'000 |
| Planisaziun e survigilonza | 115'000 |
| Acquist da terren (incl. geometer) | 130'000 |
| Divers e reserva | 150'000 |
| Total | 1'560'000 |

Damondas e menziuns

Robert Derungs dad Uors ei surstaus ch'ins vul bu sbassar la via a Buortga pli fetg, aschia ch'ei dess in'altezia da 4 m sut la cantunada dalla casa, che varga ora ella via. Tenor siu manegiar duessi quei esser pusseivel. Cun 3.85 m seigi el dil meini ch'il problem actual vegni bu sligiaus e camiuns laschien vinavon pigliar la casa.

Martin Sgier declara ch'il cantun hagi planisau il project ed ei seigi vegniu fatg quellas ponderaziuns. Naven dalla via cantunala a Buortga si el vitg vegnessi la via denton aunc pli teissa e la construcziun dalla lingia da meteor fussi era bu ideala cun quella pendenza. La via cantunala seigi sut il spitg dalla casa 3 m lada aschia ch'ei tonschi d'untgir vi da tschella vart cun camiuns.

Alexander Casanova da Lumbrein constatescha che sut la casa seigi la via curclada cun sulada da crappa. Quei seigi per promover opticamein ch'ils camiuns e vehichels untgeschan vi da tschella vart dalla via. El damonda sch'ei dessi bu ina megliera sligiazium.

Martin Sgier gi ch'in auto vegni d'untgir e stoppi aschia gnanc carrar sur la sulada. La medema intenziun hagi la sulada secapescha era per camiuns. Il plaz tonschi en quei liug.

Bruno Solèr dad Uors damonda sch'ei detti bu la pusseivladad d'alzar casa.

Martin Sgier rispunda ch'il cantun hagi bein menau quellas contractivas culs possessurs denton quei scenario pari buca dad esser pusseivels. Era la tgira da monuments seigi involvada ed ei vegni grev da far midadas vid la casa. Quei ch'ei pusseivel vegni secapescha fatg.

Vinzens Capaul da Lumbrein constatescha ch'il sviament duront las lavurs da baghegiar vegn fatgs sur la via da Vigela. El sedamonda sch'ils vischins hagian da pagar ils cuosts per puspei metter en stan lezza via cu il project per la via cantunala seigi lu serraus giu.

Il schef dil departament declara ch'il sviament vegni duvraus pér il 2026. Il stan dalla via vegni prius si avon e suenter ch'il sviament vegni duvraus. Sch'ei fetschi basegns vegni la via lu sanada ed il cantun surprandi ina cumpart da quels cuosts. La posta per exempel vegni a stuer carrar cun postas pintgas. Plinavon vegnien cuosts da perimeter pér quintai sche la via stoppi vegnir cavada si. Tier ina sanaziun che pertucchi mo la cuvrida detti ei buca ina procedera da perimeter.

Ueli Caduff da Morissen damonda sch'ins savessi bu entscheiver cul sbassament dalla via successivamein sin quei tschancun empau pli ano che la casa e suenter puspei alzar ella da l'auter maun, era puspei mo successivamein.

Era Bruno Capaul da Lumbrein sedamonda daco ch'ins seigi bu el cass da vegnir cun in project che sligi il problem cun quella situaziun. La punt santeri seigi era sin 3.8 m ed ins savessi bein era alzar lezza sin 4.0 m. Quei fussi schon da ponderar. Ei vegni fatg enzatgei denton tuttina bu enzatgei cuntenteivel. Aschia vegni ei segir era vinavon a dar camiuns che laschien pigliar la casa sche la via vegni sbassada mo sin 3.8 m enstagl sin 4.0 m.

Il president communal, Daniel Solèr engrazia pils votums. El declara ch'il project seigi staus exponius publicamein ed ins vessi giu caschun da prender posiziun duront quei temps. Inaga che l'exposiziun seigi serrada giu seigi il project approbaus e fixaus.

Proposta

La suprastonza communal propona alla radunonza d'approbar il project e da conceder il credit da CHF 1'560'000 per la sanaziun dalla via cantunala tras Lumbrein, cumpart dalla vischnaunca Lumnezia.

Conclus

La radunonza communal decida cun gronda maioritad e senza cuntravusch d'approbar il project e da conceder il credit da CHF 1'560'000 per la sanaziun dalla via cantunala tras Lumbrein, cumpart dalla vischnaunca Lumnezia.

6. Project collectiv SIE, sanaziun via d'uual Seglias (tschancun Sutscheins-Butschaniz) el vischinadi da Suraua

Introducziun

Las lavurs pil project collectiv SIE per la sanaziun dalla via d'uual denter Sutscheins e Butschaniz ein planisadas d'entscheiver il 2024, quei cun las lavurs d'impressari per il fundament e las parts purtadras. La cuvrida da catram vegn exequida previsiblamein la primavera 2025.

Il president communal, Daniel Solèr presenta il project alla radunonza communal.



| | |
|---|----------------|
| Etappa 1, 2024; Lavurs d'impressari cun la construcziun dils mirs da sustegn primavera ed igl atun la tschentada purtadra (Tragschicht) | 390'000 |
| Etappa 2, 2025; Lavurs da cuvrida | 245'000 |
| Planisaziun, submissiun, survigilanza, controlla finala | 25'000 |
| Nunprevediu | 40'000 |
| Total cuosts da project (incl. tpv) | 700'000 |
| Total da quintar cun entradas tenor scriver digl uffeci d'uaul (77%) | 539'000 |

Proposta

La suprastanza communal propona alla radunonza d'approbar il project e da conceder il credit da CHF 700'000 per la sanaziun via d'uaul Seglias (tschancun Sutscheins-Butschaniz) el vischinadi da Suraua.

Conclus

La radunonza communal decida cun gronda maiortad e senza cuntravusch d'approbar il project e da conceder il credit da CHF 700'000 per la sanaziun via d'uaul Seglias (tschancun Sutscheins-Butschaniz) el vischinadi da Suraua.

7. Naturalisaziuns

a) Manuel Eicher ed affons Anuk e Nevin Eicher

b) Ruth Elisabeth Artho

Introducziun

a) Manuel Eicher ei carschius si en Lumnezia, ei maridus ed ha dus affons. El viva cun sia famiglia a Vignogn. Siu bab, Albert Eicher ei oriunds dalla Bassa ed aschia era Manuel Eicher e ses affons.

Per la naturalisaziun vala la lescha dil dretg da burgheis dil cantun Grischun (LDBcant) dils 13-06-2017, en vigur dapi 01-01-2018.

Ils extracts dil register penal e dil register da stumadira cuntegnan neginas menziuns. Igl Uffeci da taglia dil cantun Grischun conferma ch'el ha pagau tut ils quens da taglia. Ils davos 10 onns ha el mai retratg agid social.

Il discuors persunal dil president communal, Daniel Solè e la canzlista communal, Silvana Caviezel cun Manuel Eicher ha giu liug ils 25 da schaner 2024.

Proposta

La suprastanza communal propona alla radunonza da conceder il dretg da burgheis dalla vischnaunca Lumnezia a Manuel Eicher, naschius ils 30 da matg 1980, ed a ses affons, Anuk Eicher, naschida ils 21 da schaner 2021 e Nevin Eicher, naschius ils 28 d'avrel 2022, sesents a Vignogn, Lumnezia.

Conclus

La radunonza communal decida cun gronda maioritad e senza cuntravusch da conceder il dretg da burgheis dalla vischnaunca Lumnezia a Manuel Eicher, naschius ils 30 da matg 1980, ad Anuk Eicher, naschida ils 21 da schaner 2021 ed a Nevin Eicher, naschius ils 28 d'avrel 2022, sesents a Vignogn, Lumnezia.

- b) Ruth Elisabeth Artho ei carschida si ella Bassa. Ella ha viviu 40 onns a Turitg ed ei dapi 17 onns en Lumnezia. Igl emprem vegneva ella mo per far vacanzas e viagiari, dapi il 2009 viva ella a Morissen

Per la naturalisaziun vala la lescha dil dretg da burgheis dil cantun Grischun (LDBcant) dils 13-06-2017, en vigur dapi 01-01-2018.

Ils extracts dil register penal e dil register da stumadira cuntegnan neginas menziuns. Igl Uffeci da taglia dil cantun Grischun conferma ch'ella ha pagau tut ils quens da taglia. Ils davos 10 onns ha ella mai retratg agid social.

Il discuors persunal dil president communal, Daniel Solèr e la canzlista communal, Silvana Caviezel cun Ruth Elisabeth Artho ha giu liug ils 08 da fevrer 2024.

Proposta

La suprastanza communal propona alla radunonza da conceder il dretg da burgheis dalla vischnaunca Lumnezia a Ruth Elisabeth Artho, naschida ils 26 da fevrer 1946, sesenta a Morissen, Lumnezia.

Conclus

La radunonza communal decida cun gronda maioritad e senza cuntravusch da conceder il dretg da burgheis dalla vischnaunca Lumnezia a Ruth Elisabeth Artho, naschida ils 26 da fevrer 1946, sesenta a Morissen, Lumnezia.

8. Varia

- 1) Menziuns dil president communal, Daniel Solèr:

- Inoltrau documents revisiun parziala engrondiment deponia Porclas per preexaminaziun.
- Fundaziun Reit da sanadad Surselva ils 28 da fevrer 2024.
- Crossiety, entschatta ils 22 da fevrer 2024.
- Finiziun digl engaschament da Lenia Collenberg tier la vischnaunca Lumnezia per la fin mars 2024.
- Visada dalla piazza collaboratura administraziun entras Julia Cavegn (pensum 40%) per la fin matg 2024.
- Planisaziun locala. Zona da planisaziun sur igl entir territori communal ei en vigur. Tier l'intenziun da planisar projects, s'annunziar tier la vischnaunca.
- Publicaziun dil project da consultaziun deviazium auas Uresa naven dils 23 da mars 2024.
- Votaziun communal dils 03 da mars 2024 (e-voting).
- Elecziuns communalas perioda d'uffeci 2025-2028.
- Proxima radunonza communal ei fixada ils 14 da zercladur 2024.

- 2) Primus Cavegn, schef dil departament per planisaziun dil territori ed immobiglias informescha la radunonza davart il project dalla vischnaunca per casas da pliras habitaziuns a Nurtatsch el vischinadi da Vella.

Damai ch'igl ei buca gartegiau d'anflar in consens culs proprietaris dalla parcella 4359 sto la vischnaunca far ponderaziuns en autras direcziuns. Denter auter ei l'idea ussa da cumprar la parcella 4358 per saver far enzatgei en cumbinaziun cun las parcella 4357, 4360 e 4825.

- 3) Menziuns ord las retschas dalla radunonza communal:

Guido Derungs dad Uors communichescha ch'el hagi observau ch'enzatgi hagi aviert ina deponia da tratsch el plaun sisum Peiden. El sappi buca sche quei seigi enconuschent alla suprastonza communal e levi mo far attents. Il president communal prenda per enconuschientscha l'informaziun e vegn ad ir suenter alla causa.

Robert Derungs dad Uors menziunescha la situaziun culla via cantunala tras Uors. El punct il pli stretg detti ei per part situaziuns empau prigulusas. El sappi ch'il passapei naven dalla fermada da posta encunter la punt dalla val Tersnaus seigi en planisaziun e damonda sch'ei seigi era planisau in passapei naven da leu anora encunter Plaun Fravgia.

Daniel Solèr conferma ch'il passapei naven dalla fermada tochen si tier la punt vegni exequius. Plinavon gi el che plirs vischins dad Uors hagian inoltrau alla vischnaunca ina petiziun per reducir il tempo da 50 sin 30 km/h tras Uors. Il cantun eri a sias uras vegnius plidentaus davart pliras variantas per in project cun in passapei encunter Planezzas. La discussiun vegni menada en suprastonza communal per mirar co vinavon.

Curdin Derungs da Morissen plidenta la problematica da habitaziuns pagablas per indigens. Quella resti vinavon sch'il project da Nurtatsch fetschi naufragi. Sche tut mondi endretg sappien casas veglias ch'existevan avon il 2012 vegnir spazzadas e baghegiadas ensi pli grondas, quei tenor l'iniziativa parlamentara ch'ei vegnida inoltrada dacuort. Quei fatg savessi vegnir nezegiaus per crear spazzi per indigens. Per exempel la vischnaunca da Flem praticheschi quei gia ussa aschia. La vischnaunca Lumnezia vessi cheu opziuns d'adattar la lescha da baghegiar en quella direcziun.

Primus Cavegn replica ch'ei sappi gie bu esser l'idea che la vischnaunca laschi baghegiar pliras habitaziuns secundaras per la finala ver mo ina primara.

Il president Daniel Solèr constatescha che quella decisiun dil cussegl federal seigi aunc buca sin meisa. Che casas veglias, existentas avon 2012 sappien vinavon vegnir vendidas car e bein vegni ualvess a possibilitar dapli spazi da habitar per indigens.

Gian Bundi da Vella gi ch'ei sappi vegnir inoltrau in referendum encunter quella lescha e silsuenter detti ei ina votaziun dil pievel.

Ei vegn buca pli giavischau il plaid ed il president communal, Daniel Solèr siara la radunonza.

El engrazia a convischinas e convischins per la participaziun, pil sustegn e la confidanza demussada enviars la suprastonza communal.

7144 Vella, ils 15 da mars 2024

Il president:

L'actuara:

Daniel Solèr

Silvana Caviezel